



DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ

Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS

manè discutienda, in Scholis Medicorum, die Jovis

quarta Decembris M. DCC. XXXII.

M. JOANNE-BAPTISTA-LUDOVICO CHOMEL,

Doctore Medico, Præside. *autore.*

An præcipuum Respirationis Organum Diaphragma?

I.



PIRARE vivere est. Quot ex Aëre veniunt spiranti commoda! Aëris beneficio odorifera corporum effluvia, sursum evehuntur nervorumque olfactoriorum expansiones titillando gratissimas procreant sensationes: mediante Aëre vibrantur soni, variis modulationibus vox edita Cogitationum interpres, societatis dulcedo, scientiæ nuncia, commercii vinculum, cariorem reddit vitam. Sed majora manent; Aër enim variis commixtus cibis Ventriculum subit, digestionem favet, chiloque viam sternit. Aër per tracheam arteriam ingressus, (ampliato thorace,

pulmonalibus vasculis explicatis,) virtute quâ pollet elasticâ, fibrarum excitat oscillationes, vasa sanguinea premit, sanguinem fortiter protrudit, ferique abundantior copia, sub halituosâ transpirationis specie, avolat in auras. Pulmonalis hæc perspiratio, circulationis vindex, sanguinem defæcat, eumque rubicundiores reddit, quod globulosa pars uberiori non proluatur sero. Maxima tandem sunt respirationis commoda, cum Natura sedula parens, pulmonibus dextrum Cordis Ventriculum, sinistrum verò cæteris omnibus corporis partibus addiderit; adeò patet respirationis necessitas! Verùm quaris quodnam Organum Respirationi præcipuè confertur? illud quod inspirationi expirationique potissimum auxiliatur.

I I.

VETERES nubem pro Junone captantes, Aërem esse respirationis causam existimabant. Neoterici quidam ingeniosiores, nimiumque suis confidentes rationibus, intercostales Musculos agnoverunt tanquam Respirationis Organa; At illorum brevis imbecillitas arguit; insuper læsis, aut vulneratis, aut torpentibus perficitur Respiratio; idem de musculis ad thoracem pertinentibus dicendum est; his omnibus tum intercostalibus Costas sublevantibus, tum Costas deprimentibus juvatur Respiratio, non efformatur. Quidam omnem vim à Pulmonibus oriri existimant, sed Pulmones passiva sunt tantum Organa, in Respiratione non agunt; susceperunt Aëre ampliantur, thoracem non ampliant. Visne motus illius benefici & vitalis præcipuam originem agnoscere? repetenda est ab Organo forti, elastico, eâ structurâ donato, ut fibris muscularibus elongatis idèoque validioribus constet, Arteriis irroretur, Nervorum abundant propagine corroboretur, firmissimis annectatur partibus; ita denique à Naturâ instructo ut inspirationem & expirationem, alternâ contractione & relaxatione, æqualiter promoveat. En adest Diaphragma quod contractione suâ thoracem ampliabit, relaxatione imminuet.

I I I.

DIAPHRAGMA Abdomen à thorace obliquè discriminans, Ex Bartholino musculus est trigaster, ex D. Winslow digaster tantum, musculoque superiori & inferiori conflatum. Superior Diaphragmatis musculus Xiphoideæ appendici, extremitatibus ossis & cartilagineis ultimorum Costarum & spuriarum inferiori, indèque ultimam dorsî primamque lumborum vertebra descendendo attingens, earum Corpori lateraliter, suis radiantibus fibris annectitur. Inferior Diaphragmatis musculus, fibris in fasciculum collectis conflatus, ultimam dorsî primasque lumborum vertebra, versùs mediam vertebræ partem amplectitur, eisque veluti inferiorum firmissimorum ope tendinum, quorum dexter sinistro longior est, Non hæc sola sunt Diaphragmatis retinacula, Aponevroticâ & mediâ sui parte Pericardio & Mediastino alligatur. Motibus exercendis necessarium robur Diaphragmati suppeditant Nervi phrenici è colli vertebralibus exeuntes, & quidam ex intercostalibus & Pari vago ramuli. Aorta inferior, Cœliaca, Mammaria, ipsæque intercostales & lumbares, arteriosum effundunt sanguinem, calorem nutritionemque suppeditaturæ. Residuus resorbetur sanguis, venamque cavam, azygos, subclaviamque attingit. Quâ parte tho-

racem claudit, Plevrâ; quâ parte Abdomen, Peritoneo obducitur Diaphragma. Plurimis insuper patet viis, una versùs dextrum latus, Venam cavam ascendentem transire sinit, atque ita à Naturâ fabricata est hæc apertura, ut illius margines spirabilibus constructæ fibris, nunquam ascendens sanguinis motum retardent; paululùm ad latus sinistrum, musculus inferior vel ille fibrarum fasciculus, quem musciculum inferiorem vocant, subter centro nerveo (cujus figura trifolii * speciem æmuletur,) fibras disjunctas esse sinit ut Ætrophago transeunti relinquatur via, inde fibræ veluti conjunctionem præoptantes, ununtur, ut mox bifurcationem efforment Aortæ, venæ azygos, ductuique thoracico transitum concedentem liberrimum.

M. Winslow,

I V.

RESPIRATIONI potissimùm conferre Diaphragma ne dubites. Inferioris musculi agentibus fibris, deorsum trahitur Diaphragma, relaxatis verò sursum regreditur; superiores Diaphragmatis fibræ veluti radiantes & à Centro demissæ, Costarum margines attingunt, & contractione suâ trahunt Costas mobili puncto ita affixas, ut semicirculos majores in contractione Diaphragmatis, minores verò in illius relaxatione efforment. Ea est Diaphragmatis virtus, ut dum Costæ superiùs, pro ampliandâ superiori thoracis parte, ascendunt, inferiores extrorsum moveantur, thoraxque quoad latitudinem & profunditatem ampliatur. Nulla datur in homine sano inspiratio, ni vesiculæ pulmonales aëre opportuno turgeant, ut Sanguis à majoribus ramis, in minores minimasque ramificationes effluat, ut denique omnia quæque Vasa aëris gravis & elastici præsentia compressa, serum expirabile propellant, quod quidem solo contracti Diaphragmatis beneficio evenit. Diaphragma ab otiosâ curvitate æqualiter ex unoquoque latere recedens, Pulmonum expansioni favet inspirationemque efformat. Juvat aëris elasticitas, juvant Pulmonales Vesiculæ, juvant intercostales Musculi, libera datur & facilis inspiratio. At expirationi non minùs conducit Diaphragma: pristinum etenim statum recuperare amans, Fibrarum relaxatione respectu abdominis concavum evadit; Pulmones tumidi sensim sine sensu decrescunt, & subsident, Costæ inferiores deprimuntur, thorax imminuitur. Sic Diaphragma expirationem conficit, & feriendo utilissimam procreat actionem; aliundè in Expiratione duntaxat, tussis, singultus, vox emittitur, & hæc Diaphragmati debentur.

V.

INSPIRATIONI quàm plurimùm conferre Diaphragma concedis, Iat expirationi conducere negas, nulla inquires, nulla musculo in relaxatione datur virtus, attamen cur in dilatatione cordis, cur in illius musculosæ substantiæ relaxatione, Sanguini liberior datur aditus? nonne motus peristaltici intestinorum remissio facilem excrementorum descensum sinit? Nonne in Spasmodicâ Diaphragmatis tensione vix lucet respiratio? Quid moror ergo? quid beneficos respirationis usus Diaphragmati non tribuo? omnia quæ Respiratione indigent animalia Diaphragmate donantur vel saltem muscularibus fibris Diaphragmatis vices referentibus. Inflammato, vulnerato Diaphragmate respiratio languet, Gangrænâ affecto perit. Solo Diaphragmatis beneficio spirant ægri quibus omnia jam in agone jacent, Dia-

phragmate excepto. Verùm quisquis inspirantem hominem avido lumine propius intueatur; in inspiratione tumentem Epigastricam regionem, inferiorem thoracis partem veluti ascendentem conspiciat, & agnoscat Maximam ex contracto Diaphragmate Thoracis adesse ampliationem. In Expiratione verò, introrsum veluti regresso Diaphragmate, abdomen antea tumidum videre est deprimi & cum Diaphragmate expirationi conducere. Hanc veritatem sensit Anatomicorum Princeps. * Possumus respirare, expirare, & inspirare indefinenter ope Diaphragmatis, sive moveantur Costæ, sive stent immobiles, sive earum ascensu diu ampliatum maneat thorax, sive tandem Costis ipsis quiescentibus, thorax constingatur, Diaphragma suam semper exerit virtutem, ... & paulo superius, * Diaphragmatis præcipui & singulares usus sunt thoracis dilatatio & contractio. unde cum tanto Authore concludere licet.

* M. Winslow.
exp. Anat.
p. 1187.

Idem.
p. 1185.

Ergo præcipuum Respirationis Organum Diaphragma.

DOMINI DOCTORES DISPUTATURI.

M. Jacobus Trant, è Regia Scientiarum Academia.

M. Gabriel - Antonius Jacques.

M. Joannes Herment, Medicus Regis ordinarius.

M. Petrus Maloët, Consiliarius & Medicus Regis ordinarius nec-non Domus Regia Invalidorum Ducum & Militum, Academia Scientiarum Regie Socius.

M. Claudius de la Vigne de Frescheville, Medicus Regis & Domus Regine Ordinarius.

M. Jacobus Fourneau.

M. Guillelmus de Magny.

M. Joannes Damianus Chevalier.

M. Michael - Ludovicus Reneaume de la Garanne, Censor Academiae & Regia Scientiarum Academia Socius.

Proponebat Parisiis JACOBUS-ALBERTUS HAZON,
Parisiensis, Baccalaureus Medicus, A. R. S. H. 1732.
à sextâ ad meridiem.